

28/03/2001

Jason, Eric diuji di Bukit Kiara

Mohd Ali Majid

KEHANDALAN Jason Cheon dan Eric Koh akan teruji lagi dalam Cabaran Piala Perdana 2001 yang akan berlangsung di Padang Polo Bukit Kiara Equestrian & Country Resort (BKECR, Kuala Lumpur) pada 12 hingga 15 April ini.

Dua jaguh musim lalu itu adalah antara 100 ekuin dari kelab gabungan Persatuan Ekuestrian Malaysia (EAM) akan menyertai kejohanan yang diadakan sempena hari kelahiran Perdana Menteri Datuk Seri Dr Mahathir Mohamad.

Jason yang berasal dari Korea dan jurulatih ekuin kelab Templer Park akan mempertahankan kejuaraan kejohanan peringkat pertama yang diadakan awal tahun lalu.

Sementara Eric Koh, bekas ekuin kebangsaan akan mempertahankan kejuaraan grand prix pada saingan akhir kejohanan yang diadakan November lalu.

Cabaran kali ini dijangka lebih hebat dan menarik dengan kehadiran atlit gemilang 2001 yang menjadikan kejohanan sebagai landasan untuk mendapat tempat mewakili negara ke Sukan Sea Ke XXI di Kuala Lumpur September nanti.

Semua atlit gemilang 2001 terutama ekuin show jumping dan dressage akan mempamerkan kehebatan masing-masing dengan menggunakan kuda yang bakal mengiringi mereka di Sukan Sea nanti.

Antara mereka termasuk Quzier Ambak dengan Heros dan Domingo, Azni Azar dengan Grand Slam dan Warren, Ruzailina Zainal Abidin pula dengan Murphy Brown dan Xulana.

Ekuin dressage yang turut serta termasuk muka baru seperti Zahir Abdullah yang akan menunggang Jirlow, Putri Alia Suraya (Chargall) dan Abdul Salim Fadzlay (Castor).

Selain membiasakan diri dengan kuda masing-masing, atlit gemilang juga bersaing meraih mata tertinggi untuk dipilih mewakili negara ke Sukan Sea September ini.

Sebanyak tujuh siri kejohanan diadakan bagi kedua-dua acara menjelang Sukan Sea nanti dengan setiap atlit dimestikan mengambil bahagian.

Bagi ekuin show jumping, ini penyertaan kedua setelah beraksi pada kejohanan FEI World Jumping di gelanggang 3QE di Kuang, Selangor awal bulan ini.

Hanya Quzier Ambak, Azni Azar dan Ruzailina Zainal Abidin turut serta dalam kejohanan ini sementara dua lagi iaitu Syed Omar Syed Abu Bakar dan Qabil Ambak kini berada di Eropah.

Mereka yang berlatih dan menyertai sirkit Eropah termasuk ekuin dressage Quzandria Nur dijangka kembali ke tanah air untuk menyertai kejohanan yang dianggap terulung di rantau ini.

Cabaran kali ini turut disertai ekuin luar negara yang tidak asing seperti Rafiq Radinal (Indonesia), Nina Melkonian (Jerman) dan Helena Gabrielson dari Sweden.

ARL Marketing Sdn Bhd yang berjaya menganjur kejohanan ini musim lalu sekali lagi menerima penghormatan untuk meneruskan kejohanan musim ini.

Jurucakapnya, Rohila Tahir memberitahu, selain menjadi medan ujian untuk kelayakan ke Sukan Sea, kejohanan ulung ini juga bertujuan memperkenalkan serta menarik minat generasi muda dalam bidang ekuestrian.

"Di samping itu ia dapat mendedahkan dengan lebih dekat lagi kepada ekuin masa kini tentang teknik dan selok-belok sukan berkuda," katanya.

(END)